



CONVENIO DE COLABORACIÓN ENTRE A CONSELLERÍA DE CULTURA, EDUCACIÓN, FORMACIÓN PROFESIONAL E UNIVERSIDADES E O CONCELLO DE PARADA DE SIL PARA A REALIZACIÓN DE ACTUACIÓNS ARQUEOLÓXICAS DE INVESTIGACIÓN E DOCUMENTACIÓN NO MOSTEIRO DE SANTA CRISTINA DE RIBAS DE SIL E NO CÍRCULO LÍTICO DE CASTRULLOS (PARADA DE SIL, OURENSE)

MEMORIA XUSTIFICATIVA

María del Carmen Martínez Ínsua, directora xeral de Patrimonio Cultural da consellería de Cultura, Educación, Formación Profesional e Universidades,

DECLARA:

Que esta dirección xeral de Patrimonio Cultural ten previsto formalizar co Concello de Parada de Sil, o instrumento conxugal arriba referido por un período de vixencia que abrangue dende a súa sinatura ata o 30 de novembro de 2022.

Que o instrumento conxugal ten por obxecto:

É obxecto do presente convenio regular as bases de colaboración entre a Consellería de Cultura, Educación, Formación Profesional e Universidades da Xunta de Galicia e o Concello de Parada de Sil, para a realización dunha actuación arqueolóxica no Mosteiro de Santa Cristina de Ribas e no círculo lítico de Castrullos, co obxectivo operativo de conservar o patrimonio cultural galego.

Que existe converxencia de intereses entre as entidades asinantes en orden á consecución do obxecto referido.

Que o instrumento conxugal que se pretende asinar se fundamenta no seguinte:

O mosteiro de Santa Cristina de Ribas de Sil constitúe uns dos grandes fitos monumentais e espirituais da Ribeira Sacra, de máximo interese desde o punto de vista histórico-artístico, arquitectónico e ambiental. As primeiras referencias da existencia do mosteiro datan do século IX. Inicialmente pertencía á regra de San Fructuoso pero no século X adoptou a de San Benito, gozando de gran esplendor ata o século XIV. Cos Reis Católicos e debido á centralización monástica perde importancia, converténdose en priorado do próximo Santo Estevo a partir de 1517, o que provocou o cambio de uso das dependencias, adaptándose para acoller as rendas en especie do seu coto, alterándose progresivamente a súa distribución orixinal. Na actualidade permanece a igrexa románica e dúas pandas do antigo claustro acaroadas ao norte do templo, pero remodelado profundamente en estilo neoclásico. A nivel de protección, o mosteiro de Santa Cristina de Ribas de Sil ten a consideración de ben de interese cultural (BIC), na categoría de monumento en virtude do Decreto 78/2009, de 2 de abril (DOG núm. 73 do 17.04.2009).





O xacemento arqueolóxico de Castrullos sitúase preto do lugar das Cortiñas, na parroquia de San Mamede de Forcas, nun suave outeiro que se adianta sobre o canón do río Sil. Identifícase cun círculo lítico datado na Idade do Bronce. A nivel de protección ten a condición de ben catalogado do Patrimonio Cultural de Galicia en base ao artigo 30 da Lei 5/2016, do 4 de maio, do Patrimonio cultural de Galicia, xa que forma parte do catálogo de bens culturais do Plan Básico Autonómico aprobado polo Decreto 83/2018, de 26 de xullo (DOG núm. 162, do 27.08.2018) co GA 32057002.

Tendo en conta os valores históricos e patrimoniais que aglutinan tanto o mosteiro de Santa Cristina de Ribas de Sil coma o círculo lítico de Castrullos, e a súa situación no ámbito territorial da Ribeira Sacra, declarada ben de interese cultural na categoría de paisaxe cultural polo Decreto 166/2018, do 27 de decembro (DOG núm. 254, do 31.12.2018), a Dirección Xeral do Patrimonio Cultural da Xunta de Galicia e o Concello de Parada de Sil consideran de interese asinar un convenio de colaboración para levar a cabo neste ano 2022 traballos arqueolóxicos nos referidos sitios coa finalidade de favorecer a súa investigación e documentación e así contribuír ao coñecemento e difusión do patrimonio cultural non so do referido concello senón en xeral de toda a Ribeira Sacra.

Por tanto, a través deste convenio de colaboración preténdese realizar traballos de actuacións arqueolóxicas de investigación e documentación no mosteiro de Santa Cristina de Ribas de Sil e no círculo lítico de Castrullos (Parada de Sil, Ourense).

Ademais da propia intervención arqueolóxica, tense previsto levar a cabo diferentes accións de divulgación dos traballos arqueolóxicos realizados nas que se fará constar a colaboración e financiamento da Consellería de Cultura, Educación, Formación Profesional e Universidades da Xunta de Galicia.

Que os intereses converxentes das partes asinantes exclúen o ánimo de lucro e non poden satisfacerse axeitadamente mediante a celebración dun contrato dos contemplados na Lei 9/2017, do 8 de novembro, de Contratos do Sector Público, ou doutro instrumento alleo á natureza estritamente conxenial.

En atención ao exposto, e a fin de dar cumprimento ao preceptuado no artigo 15.2. da Lei 1/2016, de 18 de xaneiro, de transparencia e bo goberno, estímase xustificado o recurso á sinatura do convenio que se pretende, con exclusión doutras figuras.

E para que conste, asínase esta memoria

